



SULEQATIGIISITSISUT  
SAMARBEJDSPARTIET

Nuuk den 18. maj - 2018

Inatsisartut Suleriaasianni § 37 imm. 1 naapertorlugu Naalackersuisunut apeqqut imaattoq matumuuna saqqummiuppara:

**Naalackersuisunut apeqqutit:**

**1. A)**

Naalackersuisut pilersaaruteqarnerlutik paasititsiniaanissaminnut napparsimasut kiisalu ilaqquttat qanigisaasut naammagittaalliorsinnaanerannut ilitsersuut pillugu, tassunga ilanngullugit napparsimasut peruluttut imaluunniit napparsimasut perululersinnaasut soorlu nappaassuarmik kræftimik napparsimasut allanillu peruluutigineqalersinnaasunik nappaatillit?

**1. B)**

Naalackersuisut pilersaaruteqarnerlutik paasititsiniaanissaminnut napparsimasut kiisalu ilaqquttat qanigisaasut tarnikkut napparsimasutut katsorsarneqartut naammagittaalliorsinnaanerannut ilitsersuut pillugu?

**1. C)**

Naalackersuisut pilersaaruteqarnerlutik peqqik.gl pillugu paasititsiniaanissaminnut aamma tassani paasissutissat pigineqartut pillugit kiisalu periuseq "peqqinnissaqarfimmik oqaloqateqarnej" pillugu?

**1. D)**

1.A-mut, 1.B-mut aamma 1.C-mut tunngatillugu napparsimasut ullumikkut qanoq paasitinneqartarpat nittartakkami peqqik.gl-mi naammagittaalliorsinnaanermut ilitsersuut eqqaassanngikkaanni?  
- Ataani atsiortup paasisimasai naapertorlugit ersernerlussinnaavoq naammagittaalliuut qanoq ittoq sulianut qanoq ittunut tunngasoq apuunneqarsinnaanersoq, tamanna ersarissarneqarsinnaannginnerluni?

**1. E)**

Innuttaasut akeqanngitsumik inatsisitigut ikiorneqarsinnaanerlutik imaluunniit allatut inatsisitigut ikiorneqarsinnaanerlutik naammagittaalliummik sananerminni Namminersorlutik Oqartussanut kommuniulluunniit anngussassamik?

- Taamaattoqarsinnaassappat taava qanoq iliortoqassava?

**2.**

Peqqinnissaqarfiup ingerlanneqarnera pillugu naammagittaalliuutit pillugit agguaqatigiisillugu akineqarnissamut qanoq siviutigisumik utaqqisoqartarpa - ukiut tallimat kingulliit eqqarsaatigalugit, tassani takuneqarsinnaalersillugu arlaatigut nikerartoqarsimanersoq.

- Tassunga ilanngunneqassapput kiffartuunneqarnej pillugu naammagittaalliuutit aamma katsorsarneqarnej pillugu naammagittaalliuutit.

**3. A)**

Nakorsaaneqarfimmi piginnaasat suut aalajangiisuuppat innuttaasunik kiffartuussineq utaqqinertaqarpallaanngitsumik ingerlanneqassappat?



SULEQATIGIISITSISUT  
SAMARBEJDSPARTIET

**3. B)**

Ukiut 5-10-t matuma siorna pissutsinut naleqqiulugu Ukiut tallimat kingulliit ingerlanerini sulisut qassit qanorlu ilinniagallit atorneqarnikuuppat napparsimasut naammagittaalliutaannik suliaqarneq eqqarsaatigalugu, tassani immikkoortillugit peqqinnissaqarfik Nakorsaaneqarfimmilu suliarineqarsimasut?

- Naalackersuisut pilersaaruteqarnerlutik naammagittaalliutinik suliaqartartut nukinnik annertusaaviginiarlugit?

**3. C)**

Nakorsaaneqarfimmi atorfiit inuttalernerneqarnissaannut ajornartorsiutit suummita aporfigineqartarpat aamma siunissaq eqqarsaatigalugu?

**3. C)**

Naalackersuisut isumaat naapertorlugu napparsimasut kiffartuunneqarnerat pillugu naammagittaalliutinut kiisalu napparsimasut katsorsarneqarnerat pillugu naammagittaalliutinut utaqqisarnissaq naammaginarloq qanoq sivisutigissava?

**4.**

Ukiut qulit kingulliit ingerlaneranni innuttaasut naammagittaalliortut qassit ajungaanikuuppat, procentinngorlugu naatsorsorlugu?

**3.**

Naalackersuisut pilersaaruteqarnerlutik nappaatinik paasiniaasarneq nukittorsarniarlugu, immikkut isiginnilernermikkut aamma/ imaluunniit piginnaanernik amerliliiikkut - taamaassappat, qanormita qinersiviup maannakkut ingerlasup ingerlanerani?

**4. A)**

Kalaallit Nunaanni "second opinion"-p atorneqartarneranut tunngatillugu, tassa napparsimasup nappaataanik paasiniaaqqittarneq imaluunniit paasiniaaqqinngitsoortarneq eqqarsaatigalugu, taava napparsimasup inatsisitigut illersorneqarnera qanoq ippa, pisinnaatitaaffii qanoq ippat?

**4. B)**

Pisuni suni napparsimasut qinnutigisinnaavaat misissuisoqaqqinnissaa/ nappaatinik suuneranik paasisaqarneq nalilersorteqqissinnaavaat aamma/ imaluunniit susoqarsimannginnera tassunga ilanngullugu allamik ilisimasalimmut nakorsiarneq aamma sinaakkutit suut atorlugit?

**4. C)**

Tassani periutsit qanoq ippat aamma malittarisassat atuuttut suuppat?

(Inatsisartuni ilaasortaq Tillie Martinussen, Suleqatigiissitsisut)

**Tunngavilersuut:**

Qineqqusaarnerup nalaani Suleqatigiissitsisut nappaatinik paasiniaasareneq, kingusinaartumik nappaatinik paasiniaasarneq imaluunniit susoqarneq ajornera pillugu naammagittaalliutinik arlalinnik tigusaqarput,



SULEQATIGIISITSISUT  
SAMARBEJDSPARTIET

taamaattumik tusarusulluinnaraluarparput qulaani ajornartorsiutit pillugit naammagittaalliorsinnaanermut ilitsersuutit innuttaasunut paasititsiniutigineqarsinnaannginnersut kiisalu aamma aqqissuussinerit

atuussinnaasut ersarissaqqunneqarput innuttaasut peqqinnissaqarfimmut tunngatillugu arlaatigut aportunneqarsimasut ikiorlugit ersarissaavigineqarniassammata.

Napparsimasut naammagittaalliuutaannik suliaqarnermi Nakorsaaneqarneqarfik qitiulluinnartumik inissimavoq taamaattumik ingerlatsivik taanna pillugu itisiliisoqarnissaa kissaatigaara [nun.gl-mi](http://nun.gl-mi) paasissutissiissutigineqareersimasut saniatigut.

Aamma malunnarpoq peqqinnissaqarfitta iluani "second opinion" eqqarsaatigalugu arlaannik amingaateqartoqartoq aamma naammagittaalliorsinnaanermut periutsit paasissutissiissutigineqarnissaat amingarpasippot taamatullu naammagittaalliornissamut ilitsersuutit kiisalu taakku sumi nassaarinqarsinnaanersut.

Aamma soqutiginassagaluarpoq tusassallugu periutsit atuuttut naammannersut aamma innuttaasut iluaqutissaminnik sumi aallersinnaanersut.

Minnerunngitsumillu paasivarput nappaatip suunerata paasineqareeraangat nunatsinni Peqqinnissaqarfimmi kiffartuussineq nunani avannarlernisullu pitsaatigigajattoq imaluunniit pitsaatigisoq, kisianni isumaqarpugut napparsimasut peqqinnissaqarfimmut saaffiginninneranniit nappaataasa paasineqarsinnaasa tungaanut utaqqisarneq misissorluartariaqartoq. Sukkanerusumik pitsaannerusumillu nappaammik suussusersiisarneq pisalersuuppat qularnanngilaq napparsimasut naammagittaalliuutaat ikilisinneqarsinnaassasut taamatullu naammagittaalliorusuttarnerat, taamaattumik apeqqutigaarput immikkoortumi tassani nukittorsaanissaq siunertaralugu sunik pilersaaruteqartoqarnersoq.

Naggataatigut Naalakkersuisut qinigaanersi pillugu pilluaritsi sulilluarisilu. Neriullunga suleqatigiilluarumaartugut.

Tillie Martinussen  
Samarbejdspartiet – Suleqatigiissitsisut  
Ilaqutariinnermut Peqqissutsimullu Ataatsimiititaliami ilaasortaq